



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : Tir Yimiyim tiryimiyim@aolima tir yimiyim TAPAK 8

Congress-i Assam nungi sorkar ketdangsütsü: Rahul Gandhi

Nuclear deal asentenshi atema US-i meranga meinyaker: Rouhani



VOL. XVIII NO. 167 (ADOK 167) DIMAPUR YANGTEPNÜ (THURSDAY) RONGCHII (APRIL) 01, 2021 ₹ 5.00

Governor RN Ravi-i Monyu salem sangoktsür

Dimapur, March 31 (TYO): Nagaland Governor R.N Ravi-i Nagaland nung alirtem aser talisa Phom nung den Monyu tepela salem metetdaksüo.

"Iba benjung nung Phom nungeri alu jung arohtsü atema temoatsü meshir. Iba benjungmong nung temeim, aria bilemstüba, medemer yimtepba

aser tai toktepba densema lir. Anungji tanü lanurtemia alemli nungi benschia aruba sobaliba mamai benschisüla" ta Governor R.N Ravi-i sangdong ka nung ashi.

Nisung ajaki COVID-19 teinyaks lateta aliba ama iba tobur tajung benjung amongtsü ayongzüker, ta paisa shisem.

NIA nem Lamhainamdi lendong bushisüngdangtsü akhanger

New Delhi, March 31 (Agencies): March 22, 2021 nü Peren district kübok Lamhainamdi yimdak nisung asem tepsetba National Investigation Agency (NIA) nem bushisüngdang südakjang ta Zeliangrong Naga nungertemi takhangba agütsüo.

New Delhi nung aliba Nagaland House nung Zeliangrong Students' Union, Delhi (ZSUD) aser Zeliangrong Welfare Association, Delhi (ZWAD)-i külem candlelight vigil ka ayonga agiogo.

Lamhainamdi yimdak Peramhialungbo, Sikamwangbo aser Itingwangbe Haikam nungertepsetba anema parnoki iba sentong ya ayongzüka agi.

"Iba mapa inyakterem tekaratiba nung apütsü aser ozüngi merenshitsu atema onoki Nagaland sorkar dang NIA nem bushisüngdang südaktsütsü mepishir" ta social worker Mathiupuang Gonmei-i ashi.

Peren aser Dimapur district tem arrtsü anasa ashishitep aketba Lamhainamdi tesem nung iba anogo gari ana rongdoktsü.

"Iba inyakyim nung parnoki shilem magi ta Naga telungpur telok karibo shiogo, saka iba mapa inyaker parnok rongnung züngsema lira azüoktsü mepishir" ta Gonmei-isa ashi.

"Putu 21 buba nung kodaser iba ama ya inyaker aser asenoki kobika yamai inyaka aotsü ta ratar" ta University of Delhi nung assistant professor Jeremiah Pame-i New Delhi nung candlelight vigil alidang ashi.

Iba sentong nung Delhi nung alir Zeliangrong nungertepsetba anema parnoki iba sentong ya ayongzüka agi.

ZSUD aser ZWAD-i iba tatalokba atema Prime Minister's Office, Ministry of Home Affairs, Nagaland Governor RN Ravi aser Chief Minister Neiphiu Rio dangi shidi zülutsü.

Bor Lengri Ao Baptist Arogo nung sannüker asü

Dimapur, March 31 (TYO): Bodbarnü Tseminyu aser Wokha tsüngda gari lendong ka nung nisung ka asü aser asem yiru.

Osang angazükba agi Wokha district kübok Longsa yim anasa lendongji atalok aser idangji Longjang nungertepsetba Jamir asü.

Asür Tsemuwati ya Bor Lengri Ao Baptist Arogo nung sannüker inyaka liasü aser lendong atalokba sülen pa mozü kidangi anir ao saka len tom nung tango satemdok. Asüri pa kinungtsü aser tanur ana

toktsür alima nungi pilaogo.

Iba lendong nung yirurtemji asür Tsemuwati'er tsüraburtem aser Bor Lengri Ao Baptist Arogo züngsem ka lir. Par asemprong Dimapur nung mozü ki ka nung anepaludar.

Osang angazükba agi parnok ya Mokochung kübok Impur nung sentong ka nung adentsü atema aodang gari lendongji ajuru.

Asür Tsemuwati den aspüla sentep sentongji asüngnep (April 1, 2021) 10:00 ako nung Bor Lengri Ao Baptist Arogo tenla kidang agitsü.

Tanü Assam & West Bengal nung election agitsü

New Delhi, March 31 (Agencies): Brihostibarnü Assam aser West Bengal nung assembly election shilem tanabuba agitsü.

Assam nung tetsür 26 densema candidate 345-i constituency 39 nung tokteptsü.

Asüng district 13 nung election agitsü aser idangji vote enoktsür lakh 73.44 lakh-i shilem agitsü. Vote enoktsürtem rongnung tetsür lakh 36.09 aser Third Gender persons 135 dena lir.

Taküm Assam assembly election nung BJP-i aniba National Democratic Alliance aser Congress-i aniba Mahajot teloktep tongti süa tokteper.

BJP-i aniba teloktep nung Asom Gana Parishad (AGP) aser United People's Party Liberal (UPPL) dena lir.

Külen, Congress-i aniba teloktep nung All India United

Democratic Front (AIUDF), Bodoland Peoples' Front (BPF), Left party tem, Assom Jatiya Party (AJP) aser Rajior Dal dena lir.

West Bengal nung tetsür 19 dena candidate 171-i constituency 30 nung tokteptsü.

Asüng agitsüba election atema vote enoktsür ajak agi nisung lakh 75.95 lir. Parnok rongnung tetsür lakh 37.12 aser Third Gender persons 89 dena lir.

West Bengal nung Bharatiya Janata Party aser All India Trinamool Congress-i menden 30 prong nung tokteper. Külen, Congress, Left party tem aser Indian Secular Front teloktemi Sanyukt Morcha tenung nung menden 15 nung tokteper.

Election Commission-i Polling Station ajak nung Voter Verifiable Paper Audit Trail (VVPAT) amshitsü renemogo.

Zeliangrong teloktemi Nagaland sorkar nem anogo 10 latetstür

Kohima, March 31 (TYO): March 22 nü mejangjatetba nisungtemi Lamhainamdi nung nisung asem tepsetba atema temeten meshia Kohima Local Ground nung Naga nungertepsetba aika adenshia Candlelight Vigil nung shilem agiogo.

Zeliang Naga nungertepsetba aser Itingwangbe Haikam, aser Peramhialungbo aser aser Sikamwangbo nungertepsetba agüja Zeliangrong Students' Union Kohima-i iba sentong ayongzüka agi.

Iba sentong ya Old MLA Hostel Junction nung agitsüba liasü saka tzünglu kanga aruba ajanga local ground nung ang alitsü tesem melen.

Iba sentong nung Zeliangrong Baudi Kohima adviror Dr Hiabe Zeliang, Angami Public Organization President Dr Kepelhusie Terhüja, Lotha Hoho Kohima President Pankathung Lotha, Tenyimi People's Organization President Timikha Koza aser Zeliangrong, Rengma, Pochury, Chakhesang, Angami o Ao Students Union lennirtemi o jembirtemi nenshia metetdaksü.

Nagaland nung kibur maliba ali kecha mali aser ali shia kibur lir anungji kati ka akhümtsüteptsüla ta o jembirtemi nenshia metetdaksü.

Tanü anüngdang Zeliangrong Baudi (Nagaland) aser Nagaland Zeliang People Organisation (NZPO) teloktemi state sorkar dang anogo 10 tsüngda iba ken o atema temeten agüjang ta memorandum ka agütsü.

Parnoki Chief Minister Neiphiu Rio nem memorandum agütsü aser March 31, 2021 nungi tenzüker anogo 10 tsüngda aibelenerem apütsü aser maitsü jangjatsü mapang latetstü.

Parnokisa Lamhainamdi yimtsüng nung mapa lemzüka aliba 9 IRB Coy indang Post Commander mapa nungi anentsütsü takhangba agütsüo.

"State sorkar onoki bilemba ama mapa meinyakra, onoki kechi junger ta bilemdir inyaksü aser iba indang tebilemstü khuretji state sorkari abentsü" ta ZBN President C.R. Zeliang aser NZPO President Kevipele lheilung nati memorandum nung metetdaksüo.

State sorkar aser District Administration o District Police-i lendong ataloktsü meteta dang liasü saka teinyaksü shitak meinyakba ajanga lendong tulu atalok, ta tenatasa ashi.

"September 6, 2019 anepdang 4:30 ako meta Sumi nungertepsetba 40-50 shi ka prangpong bener Peren District kübok Lamhainamdi yimtsüngi aru aser yim tiyong nung injang 200 shi khatok, saka iba mapang state sorkari kechi inyaker?" ta ZBN aser NZPO teloktemi asüngdang.

Iba anogo yimtsüng nung alir nisung 21 jena ao aser yim amaki arurtemi tenla ki dena kiojentem rongdoktsü. Iba tatalokba atema Jalukie PS nung FIR ka benok, sorkar dangi shidi zülü aser public-i temeten meshia sentong balala agi saka state sorkari kecha meinyak, ta parnokisa metetdaksüo.

March 22 nü nisung tepsetba matalokdang, mapa shitak meinyakba ketdangsürtem aser nisung tepseterem merenshitsu, ta parnokisa takhangba agütsü.

February 29, 2021 nü nisung kari ki 8 rongdoktsü aser parnok timbaka Kiyevi nungertem ta jangjaogo. Ano, March 2 nü Lamhainamdi nungertepsetba aser Gwangkiang den auto driver Wisubo nungertepsetba nung pur ao. Parnoki NSCN/GPRN(U) General Secretary N. Kitovi Zhimomi'er teak lu nungi süng auya ta tai tonglojka apu, ta ZBN aser NZPO-i ashi.

"Parnok pur aoba sülen Chairman, CFMG/CFSB-i anir mapa inyakba ajanga tai maketba nisung asem chiok. Iba mapangji state sorkar kechi nung liasü?" ta parnokisa asüngdang.

Sorkari N. Kitovi Zhimomi nem personal security agütsüba Police Escort vehicle 8 amshia nisung asem pur ao aser Khehoi nung NSCN/GPRN-U tesep nung anogo 12 puoka ayu, ta ZBN aser NZPO teloktemi metetdaksü.

March 17, 2021 anüngdang Prayer house ana rongdoktsü aser iba sülen March 22, 2021 nü nisung 40 shi kati prangpong tajung bener arur aser Itingwangbe Haikam, aser Peramhialungbo aser aser Sikamwangbo nungertem tepset. Onoki ola madokba ya tashimaitba agi masü, ta parnokisa ashi.

"Nisung tepsetba atema ozüng lateta aliba ama merenshitsu. Nagaland Chief Minister aser Home Minister na arakzutsüla. Lamhainamdi yimtsüng nung prangpong amertemi kiralongra mapa inyakbaji 9 IRB Coy-i nua inyaker aser iba ajanga Nagaland nung security forces-i mapa shitak meinyakba kuli sayur. State sorkari nübertem meratadaksütsüla aser ozüng alema inyakba mapa den District arrtsü mesüra ali mangatettep ken o tem memeyokteptsüla" ta ZBN aser NZPO-i metetdaksü.

"March 22, 2021 nü Zeliangrong nungertepsetba kanga mejunji reshikangshiba sülen tepset aser parnok indang Nissan Datsun aser Mahindra Pick-up garitem den külemi mi agi arong. Iba atema Sumi kin ajak dak tai tongloksüba tim masü saka Lamhainamdi nung telungpurtemi yariba mapa inyakbaji Sumi nungertepsetba meinyakba kuli nguogo" ta parnokisa ashi.

"Iba anogo tasümgangtem anasa Sumi nungertepsetba ali kümzüka ayutsü atema nisung tepseter ta shisha temerem agi shidi pezü zülur yuja liasü. State sorkari iba mapa inyakterem apütsü aser parnok indang maitsü jangjatsü atema akangakanga mapa inyaksüla" ta ZBN aser NZPO-i memorandum nung metetdaksüo.

COVID-19 Nagaland: Nisung 107 dak putet St Paul Training Institute 'containment zone' kümogo

Kohima, March 31 (TYO): Bodbarnü Nagaland nung nisung 107 dak COVID-19 aliba putetogo aser parnok züngsema COVID-19 puteter ajak agi nisung 12,340 kümogo.

"Tanü Kohima nung nisung 107 dak COVID-19 aliba putet" ta Health & Family Welfare Minister, S Pangnyu Phom-i metetdaksü.

Taküm küm anogo ka nung nisung timtiba dak COVID-19 putetbaji tanü nisung 107 dak putetba lir, kechiyong November 2020 nungi COVID-19 puteter kanga ajema aküm, ta health ketdangsür kati ashi.

Tanü puteter ajakji St Paul Training Institute, Phesama nung training agirtem dang lir.

"COVID-19 menatetba azüoktsü atema St Paul Training Institute ajunga containment zone akümba osang sangoktsür" ta Kohima Deputy Commissioner, Gregory Thejawelie-i ashi.

Iba containment zone-i aitsü mesüra adoktsü memelar ta Deputy Commissioner-isa ashi.

Containment Zone telong nung alirtem mapang shia Medical Team-i tendangtsü. Iba tesem nung sorkar indang SOPs/Advisory/ guidelines kübok ketdangsütsü, ta Kohima DC-isa metetdaksü.

Tashi mangartem Disaster Management Act, 2005, Epidemic Disease Act, 1897 aser IPC nung arlla kübok temerenshi alitsü, ta DC Gregory Thejawelie-isa ashi.

Nisung 12,340 dak putetba rongnungi 11,980 taneptsü nguogo aser nisung 113 anepaludar. Nagaland nung COVID-19 nungi

taneptsü angurji 97.07% lir.

Tang tashi nung COVID-19 puteter nisung 91 süogo saka nisung 10 bo tanga timtem ajanga asü. Maneni, nisung 156 tashi tanga state temoogo.

Tang anepalurtemji Dimapur nung nisung 5 aser Kohima nung 108 lir. ajisüaka, parnok shinga dak shirangba yimya mali.

Nagaland nung COVID-19 alitsü akok ta temolung melemi bilemba sample 1,36,361 tendangogo. RT-PCR ajanga 75,466, TrueNat ajanga 37,536 aser Rapid Antigen Test ajanga 23,359 tendang.

Nisung 63,415 nem COVID-19 vaccines agütsüo

Kohima, March 31 (TYO): Nagaland nung nisung 63,415 nem COVID-19 vaccines (covishield) agütsüo.

Bodbar tashi nung nisung 63,415 nem COVID-19 vaccine dose 87,081 agütsüo, ta State Immunization Officer Dr Ritu Thurr-i metetdaksü.

Vaccine agirtem rongnung

frontline workers 37,423, healthcare workers 12,127, teintet rogo 10,931 aser arishi küm 45 ser temapur 2,934 lir, ta pai ashi.

Healthcare workers 8,325, frontline workers 15,220, teintet rogo 114 aser arishi küm 45 ser temapur nisung 7 tashi vaccine dose anaprong agiogo, ta Dr Thurr-isa shisem.

Mokokchung nung Poshan Pakhwada 2021 tembangogo



Dimapur, Metsüremi/March 31 (TYO): Linük tesem ajunga nung tetsür aser tanurtem indang nutrition index tajungba kumdaktsütsü asoshi awareness agütsütsü nükjiding nung March 16, 2021 nungi March 31, 2021 tashi agiba Poshan Pakhwada sentong Mokokchung district nunga Social Welfare Department tawabangba kübok takok ngua agiogo.

Nutrition fortnight shibangba sentong ya Sangtemla Ward, Multi-

Purpose Hall, Mokokchung nung March 31, 2021 nü agia liasü.

EAC Mokokchung, Sentilong Ozukum ajanga sentong nung o tatsüka jembiba mapang Department of Social Welfare-i iba sentong ahiba mapang shilem tulu agiba atema pelaba lemsatepa liasü. Pai sentong nung adener ajak dang maneni mapa tajung bendanga agütsür inyaktü aser linük ka renloka tejakleni aotsü atema education, health care aser nutrition ya tongtipang ta

angatetsüla, ta ayongzüka liasü. DPO, (ICDS), Mokokchung, I. Mangliyanga ajanga Poshan Pakhwada indang osang agütsüba mapang, district nung Poshan Palhwada 2021 alidang inyakyim ajak senteper 1859 tashi inyaka liasü, ta ashi.

Iba sentong nung Atsole Khalo (Sr. Supervisor) Kubolong project menden liasü aser Team Poshan ajanga Poshan Pakhwada 2021 indang inyaksanghitem slide show sayua liasü.

Auyabamechi Dimapur nung nisung ka nem temerenshi agütsü

Dimapur, Metsüremi/March 31 (TYO): Auyabamechi ken o nung ajemdaker IPC section 392 kübok Laventhung Lotha aija küm ana tepuokdak ayutsü aser senchi sen 5000 achitsü temerenshi agütsü liasü, ta sangdong ka ajanga ashi.

Aija alisang yagi anüngdang Auto driver ka dak nungi rakzükraktema telungpur telok nung züngsem ama amokmerenba atema pua liasü.

Iba ken o ya East Police Station ajanga takok ngua bushisüngdanga liasü. Iba ken o ya Imlimongla, Assistant Public Prosecutor ajanga jembia liasü.

Magistrate ajanga obendang agütsüba mapang, Nagaland ama state nung telungpur tebilemsü agi kanga mejungi kongshir alidak tashiyim agi senotsü saruba aser rakzükraktema ya

anogoshi atalokba yimya ka ama kümogo aser timtem ajuru alirtem aser kuli alirtem tetsübu agi ola madoker, anungji state nung mapa tamajung inyaker temolung tali ulushir, ta ashi.

Anungji nüburtem kumzüka aser mapa tamajung inyakba nungi kumzüka alitsü atema aibelener nem tapet temerenshi agütsütsü tim, ta laisa ashi.

Regional SARAS Fair 2021 tembangogo



Kohima, Metsüremi/March 31 (TYO): Rural Development Department kübok Nagaland State Rural Livelihoods Mission ajanga hopta tepiyong ayongzüka Regional SARAS Fair 2021 sentong tatembang kati aruogo, kong sen lakh 11,51 ajangzüka liasü.

Iba SARAS Fair ya Kohima Local Ground nung March 25

nü tenzüka liasü aser March 31, 2021 nü tembangogo.

State kübok Self Help Group 22 arua iba sentong nung shilem agia sen 11,51,165 jenjang parnoki yanglutetba osettem yoktet, kong Kohima district ajanga sen lakh 2.30 jenjang oset timtiba yokteta liasü.

Iba sentong tembangba tenüng nung sempet balala agüja

liasü, aser item rongnung Kohima district kübok Chiephobozou Block nungi Kruovi Krotho ajanga Best Display sempet angu, Wokha district kübok Phon-Roka SHG ajanga Customer Service sempet angu, Peren district kübok Heuchu SHG ajanga Highest Sales aser Mokokchung district nungi Chuchuyimlang block kübok Teroto Naro VLO ajanga Most Hygienic sempet ngua liasü. Sempet angur ajak nem sen 10,000 agüja liasü.

Iba Fair shibangba sentong nung Secretary Rural Development Nagaland, Hokhuli K. Chishi ya alakteta jaoker ka ama arua dena liasü.



Chare block kübok aliba yimtsüngtem ajunga asoshi March 24, 2021 nü Poshan Pakhwada sentong ka agidang tangokba noksa nung angur. Iba sentong nung sorochiokba nung tetoktepba liasü, kong EAC Nockpai Konyak, Medical Officer Dr. Ehtrongli aser Thronghoky Sangtam, CDPO, ICDS Chare, Tuensang nungertem tetendanger liasü.

Kohima nung Aoleang benjong amungtsü

Dimapur, Metsüremi/March 31 (TYO): Konyak Community, Kohima ajanga Kisama nung April 3, 2021 anüngdang 12:00 ako nung Aoleang benjongmung amungtsü, ta sangdong ka ajanga ashi.

Iba sentong nung Advisor, Fire & Emergency Services, Rehabilitations and SIRD, Pohwang Konyak ya tesemdanger tongti ka ama shilem agitsü, ta sangdong ajangasa ashi.

Dy. CM-i benjong salem lemsatep

Dimapur, Metsüremi/March 31 (TYO): Deputy Chief Minister Y. Patton-i Chang, Konyak aser Phom nunger den Kundaglung, Aoleang aser Phom Monyu benjong salem lemsatepa liasü.

meteter, aser ibaji ajanga nübur takum tali tajungba kumdaktsür aser temoatsü angur, ta pai ashi. State BJP legislature tem tenüng nung tepela benjongmung salem lemsateper, ta Deputy Chief Minister ajanga sangdong ka mongpu tasen tenzüka nung ashi.

General Observer aser Expenditure Observer Tuensang tongogo



General Observer aser Expenditure Observer aser DC & DEO nungertem noksa nung angur.

Dimapur, Metsüremi/March 31 (TYO): 51 Noksen Assembly Constituency nung Bye-election agitsü aliba dak sendakba nung General Observer aser Expenditure Observer tem March 30, 2021 nü Tuensang tonga aruogo, ta sangdong ka ajanga ashi.

Bye-election dak sendakba nung General Observer aser Expenditure Observer ya Circuit House, Tuensang indang Room No.1 aser Room No. 2 nung anenzüka lir.

General Observer-i by-election asoshi renemshiba asadangtsü asoshi 51 Noksen constituency semdanga liasü aser March 30, 2021 nü candidate temi nomination agütsüba mapanga liasü.

By-election dak sendakba nung tebilemba/ashishitsü lira mapa inyakba mapang observer den tongteprateptsü akok.

Deputy Commissioner aser District Election Officer, Tuensang ajanga Observer dang constituency nung election agitsü aliba asoshi renema aliba indang metetdaksü aser DC Office chamber, Tuensang nung District Election Management Plan amoktsü.

Nüburtem asoshi Observer indang tejangja yamai alitsü:

1. General Observer: Suvendu Kanungo, IAS Address: Room no.1, Circuit House, Tuensang Mobile: 9362158423 Landline: 03861-220244
2. Expenditure Observer: Abhishek Anand, IRS Address: Room no. 2, Circuit House, Tuensang Mobile: 8787378441 Landline: 03861-220172

Peren district nung Poshan Pakhwada 2021 shibangba sentong agi

Dimapur, Metsüremi/March 31 (TYO): Department of Social Welfare ajanga Poshan Pakwada (Nutrition Fortnight) sentong Deputy Commissioner indang Conference Hall, Peren nung March 31, 2021 nü agiogo, koba March 16 nungi 31, 2021 anogotem agia liasü.

Department of Health and Family Welfare sendaktepa aliba aser nübur tenzüka maparen nung pilatsü makokba indang ashi.

ADC Peren, Mhathung Tsanglao ajanga Department aser team dang mapa tajung maneni inyaktü ajungshi aser tarutsü anogotem nunga iba dang nungi tajungtiba inyaktü ayongzüka liasü.

Iba sentong nung District Programme Officer, Asangla Jamir menden liasü aser District Program Assistant, Poshan Abhiyan, Mezilungliu Nchang ajanga Poshan Pakwada indang osang agütsü.

Deputy CMO, Dr. Lanuakum ajanga District Administration, Department of Social Welfare aser

Sentong 4000 agitsü nükjiding ayuba nungi district kübok block pongu nung sentong 2005 dang agitet, kong nisung 30,000 shii shilem agia liasü.

Sentong nung CDPO Tening, Yanbeni ajanga tepela ankep o jembia liasü.

COME ONE, COME ALL

Do visit us at the
SPECIAL HANDLOOM EXPO
AT URBAN HAAT, DIMAPUR

From : 24.03.21 to 06.04.21
Time : 10 am to 5 pm

PARTICIPANTS FROM VARIOUS STATES OF INDIA. A MEGA EVENT OF EXCLUSIVE RANGE OF HANDLOOM PRODUCTS, DAY TO DAY UTILITIES & DECORATIVE ITEMS, INNOVATIVE & WELL DESIGNED LADIES & GENTS WEAR, TRADITIONAL SHAWLS, JACKETS, BED SHEETS, CUSHION COVER, CARPETS, HANDICRAFT ITEMS, BASKETRY ETC...

ENJOY THE HANDLOOM COLOURS OF INDIA

ORGANIZED BY: Nagaland Handloom & Handicrafts Development Corporation LTD (A Govt. of Nagaland Undertaking) Dimapur : Nagaland

SPONSORED BY: Office of the Development Commissioner for Handlooms, Ministry of Textiles, Govt. of India, New Delhi

ENTRY FREE

For Your Safety Please Wear A Mask

Maintain Social Distancing

Congress-i Assam nungi sorkar ketdangsütsü: Rahul Gandhi

Guwahati, March 31 (Agencies): Congress lennir Rahul Gandhi-i Assam Assembly election shilem tasembuba atema nüboyimtsür aser pai Congress party indang 'guarantee trokbuba' agütsüogo.

Assam nung Congress-i aniba sorkar kumtetra, Assam nungi dang yimsü asütsü, ta Rahul Gandhi-i nangzük.

Assam nung Congress sorkar kumra meinprong kecha malitsü ta Rahul-isa ashi.

"Congress party-i Assam nunger nem guarantee 5 nangzükogo. Tanü ni nenok nem guarantee trokbuba agütsü. Onoki Assam nungi dang Mahajot sorkar ketdangsütsü" ta pai metetdaksü.

"Congress-i aniba Assam sorkar ketdangsüba nung New Delhi-i meinprong masütsü" ta



Rahul Gandhi

kümzuka ayutsü" ta Rahul Gandhi-i metetdaksü.

Kamrup (Rural) district kübok Chaygaon nung election rally ka nung Rahul-i jembidang December 2019 nung BJP-i aniba Assam sorkari CAA anema lungkak aiterem dak injang khaloktsüba aitsü.

Assam nung CAA anema lungkak aitdang police-i nisung 5 tashi khaset.

CAA anema noktakang lanur khasetbaji BJP sorkari Assam tepsettsü merangba liasü, ta Rahul-isa tai tongloksü.

"Ni Dipanjal Das'er kibong semdangi arudang, lanur ka dak injang khaloktsü ta masü saka Assam dak injang khaloktsü ta ni bilem. Iba tu Assam tepsettsü merangba inyakyim liasü. Pa lanur ka masü, tebilemba tajung ka liasü. Pa Assam liasü" ta Rahul-isa metetdaksü.

Rahul-isa ashi.

"Linük nung lanurtem mapa mangur timba aliba state ji Assam lir aser iba ya BJP-i inyaksaba lir. BJP-i Assam nunger lanur nem mapa koma agütsütsü memetet" ta paisa ashi.

"Congress party-i Assam sobaliba aser maitsü kümzuka ayutsü. BJP-ibo tiyazü jembir saka Congress party-i Assam nunger sobaliba aser maitsü

Assam election nung asür nem senotsü teyari agütsütsü

Guwahati, March 31 (Agencies): Assam nung election mapa inyakdang nisung pezü asüba shia nem Rs 15 lakh teyari agütsütsü ta Assam chief electoral officer Nitin Khade-i ashi.

"Election mezüngbuba shilem agiba sülen sepaitem amenba bus gari 5 Lakhimpur nungi apusoa ao. Ajisüaka, Dima Hasao-Cachar arrtsü anasa havildar ka aser home

guards 35 amenba bus gari ka tsükok aser parnok aika yiru. Iba lendong nung bus driver Papu Bhuyan aser home guard Hem Kanta Gogoi na asü" ta Khade-i ashi.

Ano, March 27 nü Sonari constituency nung on-duty polling personnel Tulshi Khanikar asü. Pa mapa teinyakdak nung temang mejungi aküm aser Dibrugarh nung aliba Assam Medical

College and Hospital-i anir ao anepalu saka asü.

Ano, home guard Hemanta Das temang mejungi akümba sülen Guwahati Medical College and Hospital (GMCH)-i anir ao saka pa len tom nung süadok.

"Election mapa teinyakdak nung yirur ajak angati yaritsü aser senotsü teyari agütsütsü" ta Assam CEO Khade-osa ashi.

Home Minister Amit Shah-i maneni tiyazü jembir

Guwahati, March 31 (Agencies): Union Home Minister Amit Shah-i Assam Assembly election shilem tasembuba atema nüboyimtsür aser iba mapang pai maneni tiyazü jembirgo.

Bodbarnü Guwahati anasa Sonapur nung election rally ka nung o jembidang BJP-i aniba sorkar mapang Assam nung lungkak aitba sentong kecha maliasü ta Amit Shah-i ashi.

Assam nung tesüiba küm pungu tashi BJP sorkari ketdangsüdag police-i tai maketba nisung ka dang mekhaset ta Amit Shah-isa metetdaksü.

"Sarbananda Sonowal lenisüba kübok Assam nung BJP sorkar mapang lungkak aitba sentong kecha maliasü aser nisung shinga police-i mekhaset" ta pai ashi.

Ajisüaka ibaji tai lir kechiyong 2019 aser 2020 nung

linük ajungalen CAA anema lungkak aitba mapang Assam tiyongtsü ser lungkak aita liasü.

BJP-i benokba Citizenship Amendment Act (CAA) anema Assam nung nisung lakh aikati yimdong nung lungkak ait.

CAA anema lungkak aitba mapang Assam kübok tesem balala nung tai maketba nisung 5 tashi police-i khaset.

Tasürtem rongnung Guwahati nung arishi küm 17 tain Sam Stafford liasü.

Union Home Minister Amit Shah-i osang tai prokshibangi tang mezüng masü.

Tan ita tetenzüklen Upper Assam nung election sentong ka nung o jembidang Amit Shah-i kasa olen jembia liasü.

Amit Shah-i Assam nung CAA (Citizenship Amendment Act) anema noktakba khenyongi samatsünür ta Assam Congress-i ashir.



Mizoram Police aser Assam Rifles yaritepa Aizawl nung Rs 34.6 lakh alang heroin apuba sülen agiba noksa angur. Osnag tejangja angazükba sülen Mongulbarnü Dawrpui Market nung mita aodang mozü shibelener ka ket nung heroin gram 77 apu. (Aizawl, March 31)

Dhalai district nung yipru ajanga teraksa bentsür aru

Agartala, March 31 (Agencies): Tripura kübok Dhalai district nung yipru ajanga nisung meyirjang ka tema timtem ajurua lir.

Mongulbar aonung Dhalai district kübok Kamalpur sub-division nung yipru den tzunglu kanga aruba ajanga teraksa jenti bentsür aruogo.

Maneni, kasa district kübok Asharambari tesem nunga tzunglu tashii aru.

"Tzunglu kanga aruba ajanga Asharambari nung kibong 19 shi kongshio" ta ketdangsürtemi ashi.

"Yipru den tzunglu ajanga kiojentem raksatsü aser süngdong aser electric poles aika laodaktsü. Iba osang angashiba sülen ketdangsürtem tesem tonga ao aser power

connectivity yangluogo" ta parnokisa ashi.

Kamalpur nunga rü laa tzunglu kanga aruogo.

"Kamalpur sub-division kübok tesem aika nung süngdongtem laoa lir. Süngdongtem laoba ajanga gari lenmang aika noktanga lir. Iba subdivision nung electricity connection shibanga lir" ta ketdangsürtemisa metetdaksü.

Kiojen malirtem atema relief camps lapokogo aser district administration telok kati teraksa anguba osang metetpeladar.

Iba tesem nung alirtemi Tripura sorkar dang nungi senotsü teyari meshiogo.

Taruba anogo ana Tripura njung tzunglu kanga arutsü ta Met department-i metetdaksüogo.



Manipur kübok Ukhrul district nung Assam Rifles sepaitemi Rs 96 lakh alang süng apuba sülen agiba noksa angur. Sepaitemi Shangshak yimdag truck gari ka nung süng bona aliba apu. (Imphal, March 31)

GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA

NO.HED/SCHO-1/2016/ Dated Kohima, the March 2021

NOTIFICATION ON HOSTEL ELIGIBILITY CERTIFICATE

It is hereby informed to hostel wardens/proprietors seeking Hostel Eligibility Certificate under the Directorate of Higher Education that the Directorate (Scholarship Section) shall issue forms from 5th to 30th April 2021 and the last date for submission of the forms will be 22nd May 2021.

Hostels due to renew their Eligibility Certificate are directed to renew within this year, failing which the permission for hostel shall be withdrawn.

The Department cautions that issue of Hostel Eligibility Certificate to the Hostels is solely to facilitate Post Matric boarders/hostellers in applying scholarship under the provision of Scholarship Guidelines. Hence, any misuse of Hostel Eligibility Certificate shall be liable to his/her own risk.

(Dr. APENI LOTH) Director Higher Education

Issued by DIPR



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 01, 2021

EXCISE PURTEMI JUNGA INYAKOGO

Nagaland nung yi meyanglutsü aser mayoktsü özüng zünga liaka, Nagaland nung yia yanglur aser tayoka talubo ayoker. Iba kuliji mapang mapang shia Assam Rifles purtemi yi yangludak tesem aser yi ayokertem apuba osang ajanga metetter. Atangji, machimajemtsü shibelenba mapatem mita nokdangtsü asoshi government-i Excise department nung inyakerkem yua lir, ajisüaka aiben Excise purtem dang nungibo Assam Rifles purtemiang teimba machimajemtsü shibelenertem apuba osang angashir. Ano, tesem kar nungbo arogo, watsü aser lokti tentetemiang machimajemtsü mita nokdangba asenoki ajurur. Aji oda, machimajemtsü shibelenba mapa mitba aser apuba mapatem nung, Excise purtem dang nungibo tangartemang teyakyakba ta bilema alidang, yakanü Dimapur nung Excise purtemi Guwahati len nungi yi bener aruba truck gari ka apuba angudang, parnok nem tenüngsang agütsür aser asen lima aser nübortem tsükchir ket nungi kümzükba mapa nung aonung temejangka junga memejangi temulung agüja inyakba angudang pelar. Akhidangbo, asen tsükchirji tangar yim aser kin liasü saka tanübo asen tsükchirji yi aser mozü kümogo. Item tsükchirtem yagibo akhidang nok nü agi samatsüba taküm dang nungibo kanga agia teimba samatsür. Aji oda, tanü Excise purtemi anir yi aser mozü mita apuba mapa nung lendong aser nüngsen tizükteta inyakba mapatemji asen chinur taküm aser kibong yi aser mozü agi meraksadaksütsü asoshi inyakba mapatem lir. Atangji, özüng anema inyakerkem mita aputsü aser parnok azüoktsübaji mapa temela masü, parnokji özüng raksartem asünungji tekümdang aser lendong nisungtem lir. Anungji, parnoki inyakba mapatem anema raratsü asoshi mezüngbuba nung, tangatetba aser temulungtetba nüngdaktsü, aji mesüra melamelaa mesüzükdaksütsü aser ashiko parnokjiang ano shibelenertem yarir kümadoktsü ana nung lir. Tanabuba nung, parnok ket nung özüng raksartem den raratsü atema nüngdak oset ajak peria akatsüla aser parnoki takok ngua inyakba mapatem reprangteta government-i konang nüngsang agütsüsüla. Atangji, yi aser mozümora mita nokdangba mapa lokti tentetemi inyakbaji junger saka tim masü, kechiyong iba mapaji arogo mesüra lokti tentet mapa masü saka Excise Narcotic purtem mapa lir. Ajisüaka, parnoka aitsütsüla masü, kechiyong Excise gate ajanga yi aser mozümora bener aitetba ajanga lanurtem taküm aika raksar aser kibong aika balalular. Anungji, asen lima nung machimajemtsü shibelenba mapatem takok ngua nokdangtettsü atema Excise Narcotic o lokti tentet aser arogo na longjemmer inyaksü junger. Tanü asüng asen lima nunga Community Policing indang jembir. Tetezü yimti anükba mapatem ya police-i dang masü saka nübortemia inyaksüla, kechiyong özüng raksartemji nübortem rongnung lir. Iba tangatetba nung Excise purtemi anira, Nagaland ya yi aser mozümora nokdangba maparentem nung alimaia pelatsüsa inyaktettsü. Yi aser mozümora abenertem mulungjang ya kanga tekülak, kechiyong kechisüdir süaka parnoki yi aser mozüji Nagalad gate atena itettsüla. Iba jagi, Excise purtemi yakonung apuba yi case 450-jia biscuits abener amai dang bilemdaksütsüsa amtsük asepa carton agi nembanger liasü. Iba amaji kari jangotsü den külemi aser ano karibo lisem abener amai lisem den yi abenba osanga lir. Ano, tamalen karibo tasümgang süngden nung yi sünga enoka bener aoba otsüa liasü. Ano, yi dang nungibo mozümora abentsüsa temelaba yanglur abener. Mozü ya kar powder aser kar süngjang ta lir, anungji karibo ango tebok dena paboker yangji enoka abener aser karibo salipong nung abener. Ano, tetsürtemi balaka telong sü nung melepboker abener. Iba amaji tasa tapu tapu yanglua chiyongsü aser süoshi nung mozümoratemji melepboka abenba agi mitkartemi meputet yoker asütsü. Tanü asenok tsükchirtem asen süngküm atena aiter aser chirnur takidak maka küma maodang aser asenok kibongtem raksaa maodang, asenok ajaki kanga temulung agüja yi aser mozümora nokdangba tongpang nung shilem agitsüla aser Excise Narcotic purtemisa, ano, temulung tagütsüba agüja asen lima tsükchirtem nungi kümzüktsü asoshi indangindanga aser tasü itita inyaksüla.

OLEMSABANG

Arogo-i nübör aser kibong yaritsü lenmang kar

~ L.Kika Pongener.

Tanü asen Naga lima rongsenketzung jenjang asadangra jenjang kangasa mejungi lir. Sorkar-a sentsüh (lialibilities) nung dang aor, kibongtem tia asadangra noklang nung shilem ter shi (10 %) taka-taiter (high class) asütsü akok, shilem metsü nungi semer shi (20 - 30 %) pei-bo peria tanü poksung alirtem (middle class) asütsü akok, aser tanüngba shilem neter (70 %) jibo sensak tia (below poverty level) nung alirtem asütsü. Loktiliba jenjang asadangra, lokti-tentet ajungaji kibong saru molok aser nubutsük agi dang alir asünung, nuburtem nem teyari/tajangzük agütsütsüsa rongsenketzung jenjang junga aliba lokti-tentetbo kata malitsü sudi. Asenoki Assam-India lima nung reprangra, lokti-tentet Co-operative Societies, Lion Club, Rotary Club etc. yamala nübör nem teyari agütsütsü akokba lokti-tentet aika lir. Itum mesukba lokti-tentettem yagi mozü ki, school aser lokti adenshidak tesem nung Waiting shed, Well, Toilet, Dustpin etc. yamala yanglutsür. Lenmang lemjem nung nübör suisupongertem tzüradang ajemtsü atema tajemtsü tzü (drinking water reserver) yanglua toktsür. Ibala mesukba ka Langpang Senso Telongjem Dimapur jubilee-mong nungdem nung Dimapur main town nung ka yangluja lir, ibajagi asen Naga nunger aser tzüma-longmar dena aika anisungzükdaksür. Iba ama mapa tajungji lokti-tentet ajaki ajizüktepa inyaksüla, talisa arogotemi nübör atema iba ama mapa tajung inyaksüla. Atangji sorkar dak dang metalokier alitsüba mebilemi arogo aser tanga lokti-tentettem-ia iba ama mapa tajung inyaksü kanga tongtipang. Ajisuaka, kanga tesasatsü-ka, asen lima nung tenteta akaba lokti-tentettem yabo ajunga kibong saru molok aser nubutsük dak dang metaloker aliba lokti-tentettem lir. Atangji tanü asen Naga lima taji sorkar nungi tenzükter alua kibong tashi rongsenketzung jenjang kangasa mejungi lir. Ajisuaka, arogotem tia asadangra, yimtsüng tila arogo kar dak alaka arogo teimba ka rongsenketzung jenjang tanga lokti-tentet dang nungibo terabo tajungba asütsü ama asadangteter. Anungji asen lima sensak tia nungi jenjang ajungketsü atema arogotem dak dang teimla tilaka lir ama asadangteter. Aji oda, arogo-i temulungtetba tajung agi inyakdi ta sura, arogo-i kibong aser nübör dang yaritettsü lenmang sadem-sadema dang lir. Taoba mapang Ao Baptist Arogo Mungdang (ABAM)-i acha-ayanga arogotemi deobar anogo ka shiteta 'Foot Hill Road' nungdem nung temulonger tenla bendena sorkar nem tenla agütsüba-to asen lima terenlok atema arogo-i shilem tajung agiba mapa tajung ka asütsü. Atangji iba mapa-to Naga nunger kin ajak dang tatishitsü tajung sayuba otsü-sutsü mapa ka asütsü. Tanü arogo-i temulungtetba tajungtiba agi inyakdi sura, ibala mesuka asen lima terenlok mapa nung kibongtem dang nungi tenla mesaruyongjia, arogo senbong nungi percentage (%) tera-ra agiteter sorkar-i mayimjemba asen lima terenlok maparen kar nung danga yariseama inyaksü koka lir.

Ano kanga dang tongtipang kaji, tanü arogo aikati Christmas mapang kiyong-kiyong (colony/sector) aser kima-yimdong (main road) nung sen merijang aika oda lakh junga endoka decoration tobur junga sentsüpranga toktepa enokteper. Hau, alima nübör dang Christmas mongpo metetdaka decoration enokbaji mapa tajung lir, aser mapa tajung dang masü, Christmas osang alima dang sangoktsüba külisüba mapa tuluka lir. Anungji kima yimdong aser kilong nung decoration enokbaji kanga tongtipang mapa ka asütsü. Ajisuaka, ano tip külen shisadangra, decoration-ji kanga jenjang tasak (luxurious) jenjang nung masü, saka tera tongmelang (simple) nung enoker, akok ka asünungbo Christmas nungdem nung mokokminer/timtemer kibongtem, tantsü-tambur haji-hakok, lemta-mara/mata-mabensa nisungtem kar nem danga teyari (relief) agütsü nungang ibajiang kanga agi tajungtiba asütsü. Kechiyong tanü asen Naga lima nung sensaker timtemer/mokokminer aika dang lir. Oda Christmas mapang mongpo meteta chirnur nem süoshi Second hand ka danga malitsütetba, Christmas mongpo meteta shi seret ka danga alitsü makokba, Christmas mapang chiyongsü jang teraka danga alitsü makokba kibongtem aika dang lir. Anungji arogotemi kima-yimdong aser tenlaki telung nung decoration (luxurious) jenjang nung sen merijang/lakh junga endoka yanglutsü melenabo sensaker timtemer mokokminer kibongtem kar nem danga teyari agütsüba-ang kanga agi tajungba asütsü ta shisadanger.

Ano tanü asen Naga nunger sadi benjong (wedding) nung sen lakh aika endoker, aser putu den apet inyakyim aodang, takar kar dak alaka aika kanga timatemer. Anungji iba 'Sadi benjong' nung arogotemi kibongtem dang yaritsü lenmang karbo lir amai asadangtetba agi, takoktsü lenmang dang sura arogo-i yamai inyaknung jungdisu ta arok külemi shisadangtsü atema lemsateper. Tenlaki compound temeküt nung jaka sadema aliba arogo ajaki, sadir kibongtem sen lakh junga endoka 'Tent' meyanglui amshitsüsa, semtu-ki tesadem, tsüngsang-mepong ajak tizüksüsa teti atema (permanent) yanglua ayutsüla. Iba semtu-ki amshiba atemaji sadir kibongtem dang sen taa tasak masü tera (nominal charge) agitsüla. Aji oda, kibong aika pei kidang kima sadema maliba ajanga saditsü atema tebilemstü tulu akar, aser ano Tent sen lakh junga endoka yanglutsüsa adoker, ajiser 'Tent' yanglu yongjia tsüngsang-mepong mejungra timtem tetsükdaksü ajurur. Anungji iba timtemya makatsüsa arogo-i 'Semtu-ki' teti atema yanglua yutetra, ibajagi sadir kibong ajak anisungzük tulu asütsü. Dimapur Ao Baptist Arogo (DABA)-i iba ama 'Semtu-ki' ka yanglua akaba agi sadir kibong aika anisungzük/tajangzük ngudagi. Ano tanü putu nung 'Fashion' ka amai toktepa naro decoration enokdang sen merijang aikasa endoker. Anungji kokrabang arogo-i teti atema sadir kibong ajunga amshitsüsa 'Naro' decoration tongmelang (simple) ka renema ayutsüla, aser sadi anogo ajak nung iba decorationji enoktsüla. Iba dakji alaka nuja shingaia pei mulungba ama decoration enoktsü memelatsüla. Aji oda iba amaji arogo ajaki inyaktet nungbo, takar sensaker kecha tebandang mali, kibong ajak asoshi tajangzük asütsü, aser tajangzük dang masü, sadir kibong ajak liromedema (uniform) tobur tajung ka asütsü. Hau, arogo ajak asoshi iba ya takoktsü masütsü akok, saka akokertemi danga yamaji inyaktet asübo nübör ajak asoshi aser kibongtem asoshi tajangzük tulu asütsü ta arok külemi shisadangtsü atema lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Wara liaka 2020 kum Argentine Yihuda nunger aika Israel-i ogo



2020 kum Argentina nungi Yihuda nunger Israel nung Tel Aviv yimti anasa aliba Ben Gurion Airport tonga arudang tangokba noksa nung angur.

March 31, 2021: Yakum coronavirus wara liaka aser linuk arrotsitem shibanga liaka Argentina nungi Yihuda nunger aika Israel-i ogo; tesuiba kumtem nung Yihuda nunger Israel-i aoba den medemdangra yakum shilem 26 agi timba ogo.

Argentina nung Yihuda nunger 300,000 shi lir aser Israel Department of Aliyah

Promotion-i ketdangsüba kübok 2020 kum Yihuda nunger aika Israel-i ao.

Parnok aikati jelia Ibri oshi angazükba sülen Tel Aviv (Israel) tonga ao.

Argentina, Chile aser Uruguay linuktem nung Aliyah Promotion tongti, Alejandro Mellincovsky-i, "Israel nung vaccination tenzükba aser rongsenketsung shia aruba

ajanga linuk shibangba mapang nung süaka iba maparen takok nguogo," ta ashi.

Ano kari ashiba agibo, Argentina nung rongsenketsung jenjang tamajungba akümba, osetsüset ajak nung jenjang kanga atuba aser Yihuda nunger kibong 1,200-i senotsü teyari nungdakba kulitem ajanga parnok aika Israel-i ao.

Kaduna State nung Arogo bus ka nungi Khristan 8 puer ao

March 31, 2021: March 26, 2021 nü Nigeria kübok Kaduna State nung Arogo sentong ka nung adentsü atema Arogo nungertem bus ka nung aoba mapang nung prangpong amer telok kati bus nokdang aser Khristan 8 puer ao.

Redeemed Christian Church of God Arogo nungi zungsemtemji Kafanchan nung Arogo nunger Easter sentong "Let's Go a Fishing" renemtsü atema aoba mapang nung prangpong amer telok kati bus ji soitba sülen parnok ajak puer ao, ta Arogo otongdari metetdaksü.

Arogo indang bus ji iba tesem nungji toktsü. Bus nungji "The Redeemed Christian Church of God, Region 30, Trinity Sanctuary, Kaduna" ta zülua lir.

Redeemed Christian Church nung Pastor aser media & public relations tongti, Olaitan Olubiyi-i par Arogo nungi zungsemtem puer aoba osangji metetdaksü.

Osangbenertem den jembidang pastor-i, par zungsemtem kumzüksü atema Arogoi security agencies den tongtepratepa inyakdar, ta metetdaksü.

Pastor-isa, "Iba tatalokba atema onok kanga mepelar, aser Arogo ka ama asenoki inyaksü tajungtibaji Tsüngrem dang sarasademtsüba dang. Arogo ka ama onoki sarasademdar aser Tsüngrem dang Pai melungba inyakang ta ashir," ta metetdaksü.

Police-i Khristantem bushi tenzükogo, aser Khristantem

puer aoertemia Khristantemji chioktsü atema parnok nem sen agüjang ta Arogo nem takhangba agütsüogo.

Amongnü (March 28) leadership retreat agiba mapang nung Christian Association of Nigeria's Youth Wing National Chairman, Belusochukwu Enwer-i sorkar dang meimchirtem anema inyakba mapatem nokdangang, ta takhangba agüja liasü.

Nigeria nung iba ama tensa ya sorkari mazüoktetra nüburtemi pei kumzuka alitsü atema peisasa inyaksüsa akümtsü, ta pai metetdakja liasü.

"Kafanchan nung sarasadem sentong nung adentsü atema RCCG Arogo nungi Khristantem Kaduna Province nungi Kafanchan-i aoba mapang parnok apuba atema onok melung züreper. Nisung puer aoba tatalokba kanga bulua akümer, aser iba yagi onok laktetogo," ta Enwer-i ashi.

Nigeria nung atalokba ya Tsüngremi dang anendaktsütetsü, anungji asenoki sarasademtsüla, ta pai ashi.

Arogo otongdari ashiba agi, Khristan 8 ji chioktsü atema Arogo dang US sen 130,000 akhangar.

Osangbener den jembidang Police Public Relations Officer, Mohammed Jalige-i, Arogo bus jibo nguogo, ta metetdaksü.

Hopta ana tejaklen March 11 nüa prangpong amer telok kati Kaduna State nungsa school ka nungi kaketshir 39

puer ao.

Africa nung nütsung timba aliba linuk, Nigeria nung nisung puer aoba sülen sen akhangba ya kanga bulua atalokdar.

Yakum December 24 nüa Boko Haram kiralongrar teloki Nigeria nung pastor Bulus Yikura puer aoba sülen pa chioktsü atema sen khanga liasü.

Kiralongrar telok jagi sayaba video ka nung pastor-i Christian Association of Nigeria aser Nigeria sorkar na dang pa kumzükang ta mepishia liasü.

Joko pastor Yikura tepsettsü ghonda ishika dang anünga lia pa chioktsü atema akhangba senji Arogoi agütsütet aser pa March 3, 2021 nü chioka liasü.

February 26 nüa Nigeria nung boarding school ka nungi tetsür 300 jungnüa puer aoba sülen anogo ishika sülen ang chioka liasü.

Alima nung kiralongra agi tamajungtiba kongshiba linuktem rongnung Nigeria ya tasembuba jenjang nung lir; 2001 kum nungi 2019 kum tashi nung Nigeria nung kiralongrartem nisung 22,000 dak tema tepsetogo, ta Global Terrorism Index-i metetdaksü.

Kum shia alima nung Khristantem timba tepsetba linukji Nigeria lir (Open Doors USA). Iba linuk nung Khristan nütsung million 95 dak tema lir.

Ano alima nung Khristantem tamajungtiba reshikangshiba linuktem rongnung Nigeria linuk ya jenjang 9buba nung lir (Open Door's World Watch List).

ANO GO ABEN TSÜNGREM DEN

Nai komala tola asemer ?

"Anungji Tsüngrem meyong shimtetba ama aser temeimba, aria bilemba temulung yimlibilem, tila akümba, ajemaluba, talangka aremzükba item sübuang."

Ocet tila ka nung zungshibaji Liverpool club-pur jersey kechiba tang ya kanga sabua asemer ta asü nung parnok goal keeper, Alisson Becker-i asemba agi ta langzüba ka zülua angu. Tolaji masü saka shibai asemer iba jagi tola jenjangji kadaktsür. Iba ocet zungshidang laishiba nunga sübutsü indang shia aliba bilemteter. Paul-i Kolosi nunger dang temeimba, aria bilemba temulung yimlibilem, tila akümba, ajemaluba, talangka aremzükba item sübuang ta shia lir. Tamanger ka tanela tolaji item ayakji lir; kechiaser Yisua ibaji sübu aser jenti pa sülen anidak. Mamanger puatsübaji asen dak itemji sübua lira tangari aseni asemba jaklaji nukshia akümtsü. Kibubai asenok nem tenyaba mapa nungloktsübaji asen takum libaliro, yimyakoya, aser asen jembishinü agi Yisu tobur ajungji sayutsü nungloktsü. Asenok Yisu nütsungtem aliba yimya agi yangpanga sübuba agi samaba tanela anir marutettsü, saka ajemaluba, tila akümba, aremzükba itemji sübuba agi Yisu tali meteta kumdaktsütsü. Na-a kechi koma tola süma lir?

Sarasadem

Temeim Yisu, ne yimya agi ni sübua alitsü teti ni yariangma, kechiyong karibosa ni repringdar. Anungji Ne tobur ajung angutsü, ni ajemaluba sübutsü sübudi. Amen

Khristantem reshikangshi agi US nunger Khristantemi tebilemtsü akar

March 31, 2021: Alima kiralongrar telok balalai tesem ajungalen Khristantem aluyimertem timba aliba reshikangshiba tamajungba Khristantem reshikangshir aser akümba agi America nung jenti tepseter.

Catholic Khristantemi kanga Alima nung reshikangshi tebilemtsü katsür, ta survey ka tamajungba ajuruba yimsüji ajanga bushitetogo, ta tawa Khristan yimsü lir, aser linuk Aid to the Church in Need-USA-i metetdaksü.

Alima nung Khristantem reshikangshiba atema Director of Advocacy, tebilemtsü katsür, ta ashir International Christian Catholic Khristan shilemji Concern, Matias Pertula-i, yakumbo 41% dang liasü saka "International Christian takumbo shilem 67 kumogo. Concern (ICC) nung onok mission kübok shilem kaji, Alima nung Khristantem reshikangshiba kanga bulua alima tesem balala nung akümer, talisa tesüiba kum Khristantem reshikangshiba ishika tsüngda kanga mita repringtsü atema lir. Iba tamajungba kumogo. tebilemtsü ya tamajungba akümer. Tamangba yimsü ajak

Tatishitsü agi, India nung Ato kilonser Modi aser pai aniba BJP party, iba denji külemi RSS aser VHP teloktemi tanga tamangba yimsütem magizükteter aser Hindu yimsü mamangertem sempar, ta parnoki metetdaksü.

Ano külen India kidanger-Pakistan nung Muslim nütsung timba lir, aser iba linuk nunga tsüngrem mezüngmeshiba ozüngtem nung ajemdaker Khristantem nem tai tonglokja reshikangshir.

Nigeria nunga talisa Middle Belt region nung Islamic

OLONG PAITEP # 5769

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPIEN		LANGTSÜNGLEN	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kaket ka - (5)		5. Tsüngremi mezüng pokttdaktsüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutü - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

OLONG PAITEP # 5768 TELANGZÜBA

TIPIEN :	LANGTSÜNGLEN :
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,	1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



2021 MARCH ITA LILI RESULT !

March ita nung Lili tajungtiba (First) shimteta tanü yangi lephsia agütsür. Lili zülur-i April 10, 2021 tashi nung Tir Yimyim Office nungi senpet agizüktsü mepishia metetdaksür.

LOKTI SORO JUNGDAKTSÜDANG KIBONG SORO MAJUNGER :

Alokba : Hai tantsü...Na anogo shia anepdang nungi aonung nikongdang tashi telok-tenji Mapa...telok-telok nungdak senudang tanur ajak anak aoyi kümdaktsür ajaaa.... Anungji tanur bentet-rateta maküm tashibo khen ajem-ajema kidang mener tanur anepalua reprangang jo..... Tang chipang-nupang mapang tetsür kidang mamen senzüba agi... Reprangangjo tanurtem kima yimdong nung yamai seplepa jajaba ya tangar danga aakseter ako...Lokti soro jungdaktsüadang asen kibong soro kangasa mejungi kümdar-kodi...!!!

Warakla : Ayyee...tokorashii...ni dang masü na-a anepdang anepongi yimden mapa... lokti mapa...party mapa ademer senzüadang kibong telungi aluba ya ngudar südi-do.... Lokti-tentet takaba ajunga nung naisa tatongknüba...tanü-a saru-molok paikaji sarur ta...asüngbo ano tenla-tenji paikaji nangzükogo ta...Lokti takar kümdaktsür... saka kibongbo sensakpo kümdar-kodi...!!!

- L.Kika Pongener.

TANÜBO NAI LANGZÜANG

Q. Freedom Pineapple Movement ya _____ nung saya.

- A.Twitter B.Facebook C.Moj D.Google

(Taruba adok nung onoki langzüksü)

YASHI ADOK TELANGZÜBA : 2012

AO OSHI ANGAZÜKDAK:

TANÜ ANGAZÜKTSÜBA OJANG

Amu

(v) Tenük shibang (close eyes)

* Sannükeri sarasadem dang nisung ajak tenük amu.

Amak

(v) Telok kati telok ka atsüngdoktsü raraba (attack / invade)

* Alexander tulusangi India amak.



Tir Yimyim

NAI-A YA METETTER MA?

2021 APRIL ITA TONGTIPANG ANGOTEM YAMAI ALITSÜ :

- April 1 - April Fools' Day
- April 2 - Good Friday
- World Autism Awareness Day - April 4
- Easter Sunday
- International Day for Mine Awareness and Assistance in Mine Action
- April 5 - International Day of Conscience
- National Maritime Day
- April 6 - International Day of Sport for Development and Peace
- April 7 - International Day of Reflection on the 1994 Genocide against the Tutsi in Rwanda
- World Health Day
- April 10 - World Homeopathy Day
- April 13 - Jallianwala Bagh Massacre
- April 12 - International Day of Human Space Flight
- April 14 - World Chagas Disease Day
- Ambedkar Jayanti
- April 17 - World Hemophilia Day
- April 18 - World Heritage Day
- April 20 - Chinese Language Day
- April 21 - World Creativity and Innovation Day
- April 22 - Earth Day - International Girls in ICT Day - International Mother Earth Day
- April 23 - World Book and Copyright Day - English Language Day - Spanish Language Day
- April 24 - World Immunization Week [WHO]
- International Day of Multilateralism and Diplomacy for Peace
- April 25 - World Malaria Day
- International Delegate's Day
- April 26 - International Chernobyl Disaster Remembrance Day
- World Intellectual Property Day
- April 28 - World Day for Safety and Health at Work
- April 30 - International Jazz Day

SUDOKU # 5812

TELANGZÜBA# 5811

			8	7				1	9	3	7	4	6	5	2	8	
	1		4			9	7	3	7	4	6	2	8	5	3	9	1
				3		5	8		5	2	8	3	9	1	6	7	4
		2							3	1	9	6	2	8	7	4	5
			5	6	1	4			8	6	7	5	3	4	2	1	9
6	4	7		1	8	3			4	5	2	1	7	9	8	3	6
	6	8	1	5		2	7		9	3	5	8	1	7	4	6	2
		9		3		8			6	7	4	9	5	2	1	8	3
				7		4	6		2	8	1	4	6	3	9	5	7

OJANG LUTEP # 5356

- RIKABO :
- SÜBTETU :
- GIA :
- ÜKSHTSIR :
- GDATSÜNNG :
- IPE :
- NANKOG :
- JAAK :
- NGZÜA :
- ZÜKAR :

OJANG LUTEP TELANGZÜBA # 5355

ASÜKHU ABENERI TASÜRJI SHIA ARUTSÜ AMA TETI
BILEMTETA MANG MAYIMTSÜLA

TAN HOPTA ATEMA - KOMA SÜLA ?

Q. Asenoka tsümartem amato yimtak dang septepa melii, jokshia jokshia asüyonga, alu nung dang lia alu ayim nunga koma süla ?



Hyderabad, Metsüremi/March 31, 2021: Bodhbarnü Hyderabad nung Hyderabad City Police-i 'Use Masks and Protect Your Families' omen nung awareness program ka ayongzuka agidang tangokba noksa nung angur.

Tanü nungi arrshi küm 45 temapur nem Covid vaccine agütsütsü

New Delhi, Metsüremi/ March 31 (Agencies): India linük tesem aika nung coronavirus wara tanaben bulua prokba mapang nung Centre sorkari, iba tensa ya tamajungba kümndar, ta shia state tem dang, iba wara tali prokba districts ajak nung taruba hopta ana tsüingda arrshi küm 45 ser temapur ajak nem vaccine agütsütsü atema inyadaktüsüner, ta mepishia metetdaktüsügo.

April 1 nungi tenzuka sorkari coronavirus vaccination shilem tasembuba tenzüksü aser iba mapang nung arrshi küm 45 ser temapurtem nem coronavirus vaccine agütsütsü.

Tesüiba ita ka tsüingda coronavirus case shilem 70 dak tema aliba district 46 den taoba Honibarnü senden amendang Centre sorkari, coronavirus agi asürtem shilem 90 dak temabo arrshi küm 45 ser temapurtem lir, ta metetdakja liasü.

Hospital aser ICUs ajak renema alitsüla, ta shia Centre sorkarisa, coronavirus case ya tanen makai timba kümra linük nung healthcare system agi mayimjemtsü, ta metetdaktüsü.

Centre-isa states aser union territories ajak dang district sasep nung rangloker iba wara anema raratsü metetdaktüsü. District shiai pepei sasep nung asalentong yanglua inyaktüsü, ta Centre sorkari tuyua liasü.

Union Health Ministry-i ashiba agi, tesüiba ghonda 24 tsüingda linük nung ano nisung 56,221 dak coronavirus putetogo aser ibaji densemabo linük nung coronavirus case

ajak senteper 1,20,95,855 jungogo; tesüiba anogo ka tsüingda iba tashidak agi ano nisung 271 süogo aser asür ajak agi 1,62,114 jungogo.

Bodhbarnü New Delhi nung osangbenertem den jembidang NITI Aayog züingsem (Health), V K Paul-i, "Covid-19 tensa tamajungba kümndar. Tesüiba hopta ishika tsüingda state kar nungbo iba ya shisabulu tuluka kümogo. State shingaia temelung sür zübazülema malitsüla," ta ashi.

Health Secretary, Rajesh Bhushan-i, linük nung covid case tamajungba district 10 rongnung district 8 bo-Maharashtra nung tener aser Delhi (district ka ama züingoker) lir, ta metetdaktüsü.

Tang linük nung covid agi teshirangdakpur timba aliba district 10 rongnung Pune (59,475), Mumbai (46,248), Nagpur (45,322), Thane (35,264), Nashik (26,553), Aurangabad (21,282), Bengaluru Urban (16,259), Nanded (15,171), Delhi (8,032) aser Ahmednagar (7,952) lir.

Bhushan-i ashiba agi, yaküm August-November nung wara kanga prokba district kar nungbo ano tang tanaben iba wara kanga prokdar.

"Iba dak alia yaküm iba wara kangabo meprokb district tasen kar nung iba tashidak kanga prokdar. Ajisüaka tang iba wara süngjema aliba states, UTs aser aser district temi temelung sür malitsüla saka kanga kümndangtsüla," ta pai ashi.

Taoba hopta Maharashtra nung iba tashidak putetba shilem 23 liasü, iba sülen Punjab nung shilem 8.82, Chhattisgarh nung 8.24, Madhya Pradesh nung 7.82, Tamil Nadu nung 2.5, Karnataka nung 2.45, Gujarat nung 2.22 aser Delhi nung shilem 2.04 liasü.

Taoba hopta linük nung iba tashidak putetba shilem 5.65 liasü.

Linük nung anogo shia iba tashidak timba putetba aser timba asüba state ji Maharashtra lir; iba tetezü nisungtemi tekümdangtsü tetuyuba balala mebeshir, ta Bhushan-i metetdaktüsü.

Punjab nung February ita tetenzüklen anogo shia nisung 300 tema dak iba tashidak putetba liasü, saka tangbo anogo shia 2,700 tema dak iba tashidak putetdar. February nung anogo shia nisung 8 shi asü saka tang anogo shia nisung 50 dak tema asür.

Punjab sorkari taruba anogo 10 tashi tenokdangba balala benokogo. Punjab Chief Minister Amarinder Singh-i April 10 tashi school aser college tema shibangtsü tuyuogo.

Bhushan-i shidi ajanga states aser UTs ajak dang, "Tashidak puteta alir ajurua alirtem anogo asem tsüingda jangjatsüla. Close contacts tetezü kibong züingsemtem dang masü saka shiranger ajurua alirtem ajak lir," ta metetdaktüsü.

"Covid facilities masüba hospital tem Covid facilities akümtsüla. Nija aser sorkar public health facilities ajak renema alitsüla," ta paisa shisem.

SC-i shimba Committee-i aluyimba ozüingtem indang report agütsüogo

New Delhi, March 31 (Agencies): Aluyimertemi aluyimba ozüing tasen anema maneni longkak tesashiba aittsü telemtetba agir aliba mapang nung aluyimba ozüing tasen asem reprangshitsü atema Supreme Court-i shimba committee-i Court nem iba report agütsüogo.

Committee-i March 19, 2021 nü SC nem iba report agütsüogo, ta Bodhbarnü committee nung züingsem kati metetdaktüsü.

SC-i aluyimba ozüing tasen asemji mebenoki alitsü sorkar dang tuyuba sülen SC-i committee ya tenteta liasü. Aluyimba ozüing tasen asem onük nung Centre sorkar aser aluyimertem union tsüingda senden aiben menaka telemtetba magitetba sülen January 11 nü SC-i züingsem pezüü akümba committee ya tenteta liasü.

Tesüiba ita pezü dak tali Punjab, Uttar Pradesh, Haryana aser tanga state tem nungi aluyimertem Delhi arrtsülen adenshia ozüing tasen asem anema longkak aitar.

Item ozüing asem shisadangtsü aser stakeholders den jembia report yanglutsü atema SC-i shimba committee nem ita ana mapang lemezükja liasü.

Bodhbarnü osangbener den jembidang committee züingsem, P K Mishra-i, "Onoki March 19 nü report agütsüogo. Joko court-i dang telemtetba agitsü," ta metetdaktüsü.

Committee official website nung shia aliba agi, parnoki aluyimertem unions, farmer producers organisations (FPOs) procurement agencies, mongintem, shisashirtem aser state agriculture marketing boards densema stakeholders den senden 12 ben tashi menogo.

Iba sülen committee senden 9 ben mena iba report yanglu.

Iba committee nung züingsem pezüji, Mishra den Shetkari Sanghatana Tir, Anil Ghanwat, taoba mapang Commission for Agricultural Costs & Prices (CACPC) Chairman, Ashok Gulati aser Bhartiya Kisan Union Tir, Bhupinder Singh Mann nung shim saka Singh-ibo iba committee nung madentsü lemet.



Thrissur (Kerala), March 31, 2021: Kerala nung Assembly election agitsü anogo ishika dang lia Bodhbarnü Thrissur nung Congress General Secretary, Priyanka Gandhi Vadra-i party candidate tem atema nüboyimtsüba sentong ka nung jembiba noksa nung angur.

BJP anema opposition longjemtsü mapang tongogo: Mamata indang metetdaktüsür."

New Delhi, March 31 (Agencies): Trinamool Congress (TMC) tongti lenir aser West Bengal Chief Minister, Mamata Banerjee-i shidi ajanga BJP nung madenba party tem nungi lenirtem dang BJP aser par sorkari democracy aser linük temzüng alema inyakba mapatem metetdaktüsü.

West Bengal nung assembly election tanabuba shilem agitsü lia Mamata-i party balala nungi lenirtem dangi züluba shidiji Bodhbarnü TMC-i sangdonga liasü.

Shidi nungji, Centre nung BJP-i aniba sorkar inakyim ajanga tanga party temi yimsüsüba state tem timtemba metetdaktüsüba den külemi BJP anema opposition party tem longjemtsü ayongzuka lir.

Shidi nungji Mamata-i yamai shia lir, "Ni nü dangi aser BJP nung madenba party balala nung lenirtem dangi iba shidi ya züluba Centre nung BJP-i aniba sorkari democracy aser India linük temzüng alema inyakbatem

Tawa Parliament House anaprongla nung National Capital Territory of Delhi (Amendment) Bill agizükba dak sendakba nung lai, iba ya tejashitsü tuluka lir, ta ashi.

"Iba ozüing ya ajanga Centre nung BJP sorkari Delhi nung nüburtemi democratic inakyim ajanga shimba sorkar tashi ajak rakzüker Centre-i shimba Lt Governor nem agütsüogo. Lt Governor ya Viceroy of Delhi amai shimogo, aser pai Home Minister aser Ato kilonser na tetuyuba nung inyaktüsü," ta Trinamool Congress tongti lenirisa metetdaktüsü.

Mamata-i kaket tapak asem nung züluba shidiji Congress chairperson Sonia Gandhi, NCP tongti lenir Sharad Pawar, DMK tongti MK Stalin, Samajwadi Party tongti Akhilesh Yadav, RJD tongti Tejashwi Yadav aser Shiv Sena tongti, Uddhav Thackeray nung densema opposition lenir aika nem agütsüogo.



Vijayawada, March 31, 2021: Bodhbarnü Vijayawada anasa CM Camp office, Tadepalli nung Andhra Pradesh Chief Minister, Y S Jagan Mohan Reddy-i sen crore 254 indang 'YSR' Insurance tenzüksüba noksa nung angur.

Indonesia-i Sriwijaya Air jet indang cockpit voice recorder ngutetogo



Jakarta, Metsüremi/March 31 : National Transportation Safety Committee (KNKT) züngsemtemi Jawa Sea nung tsükokba Sriwijaya Air tayimtsü indang Cockpit Voice Recorder (CVR) aliba süngden ka amer aliba noksa nung angur. Mongulbarnü ngutetba CVR yagi nisung 62 takum samaba lendong indang bushisüngdangba nung yaritsü, ta ketdangsürtem Bodhbarnü ashi.

Jakarta, Metsüremi/March 31 (Agencies): Indonesia transport ministry ajanga January 9 nü ali nungi ayamesor mapang tatsüka lir Java Sea nung tsükokba Sriwijaya Air jet indang cockpit voice recorder ngutetogo, ta sangdongogo. Iba tayimtsü nung nisung 62 mena liasü, aser parnok ajak asü.

Bodhbarnü osangbener senden ka nung jembiba mapang, iba recorder ya Mongulbarnü menur ngutet, ta Indonesian Transport Minister Budi Karya Sumadi-i ashi.

Tzüşirtemi arishi küm 26 tain Boeign 737-500 indang voice recorder indang casing aser beacon yabo tsükoker anogo ishika tsüngta ngutet,

saka memory unit ya angutsü asoshi ita asem jungnüa agi, koba tzü tarokbo masü saka molushi agi sünga alidak liasü.

2018 küm anasa aliba tzüyim nung tsükokba Lion Air 737 MAX indang voice recorder ngutettsü asoshia kasa mapang agia liasü.

Sriwijaya tsükokba bushisüngdangba temi iba tayimtsü indang engine thrust meshidaki kuma tayimtsü ya tzüyim nung oa tsüok, ta shia liasü.

Iba osang ya tayimtsü indang danga black box aser flight data recorder nungi ngutetba dena lir, koba tayimtsü tsükokli nguteta liasü.

Iba voice recorder ya ajanga pilot temi mera agibatem

bushisüngdangba angatettsü.

Iba tayimtsü ya international flight ishika dang lir, saka January lendong sülen alimai meteta akum.

2003 küm iba tayimtsü ka dang liasü, saka Sriwijaya Air ya Indonesia nung airline group tulutiba jenjang asem buba tongtet, aser parnoki tayimtsü tejentem jenjang talang agi alia dangartem mejajaba lenmangtem nunga jaja liasü.

Tayimtsü tejentem ya junga anepalura tayimtsü tasentem amai amshir, saka iba ama yanglua amshitsü nung sen jenti indoker. Iba tayimtsü nung totzü kanga agir, anungji amshiba nung rongsen tali indoker.

Nuclear deal asentenshi atema US-i meranga meinyaker: Rouhani

Tehran, Metsüremi/March 31 (Agencies): Biden administration ajanga 2015 nuclear deal nung mangatetep aliba angateteptsü asoshi sentong tasen ka benok, ta osang angazükba sülen, United States nungi iba atema meranga inyakba mali ta Iran-i ajiteter, ta Tir Hassan Rouhani-i ashi.

Bodhbarnü cabinet nung jembiba television ajanga sayuba nung, US Tir Joe Biden-i diplomacy nung temolung agütsür aser taoba tir Donald Trump-i inyakba amabo meinyaker, ta Rouhani-i tuteta ashi.

Ajisüaka Biden administration-i jembiba mapa kuma meinyaker, ta Iran tiri ashi, koba 2015 tezüngzüktep nungi ainshiba mapang Trump-i 2018 küm tenokdangba tesashi agütsüba maneni amshiba indang athishia ashi.

"Naia Trump ya kiralongrar ta agizükteter na? Nai magizüktetra, nai jembiba ajunga tamakitsü lir. Nai agizüktetra pai inyakba mapa tem nai maneni meinyaktsüla," ta pai ashi.

US-i tenokdangba agütsüba ajanga Iran nung takum jenjang nunga kongshi, Tehran-i bendang linüktem nungi

chiyongtsü, mozü aser COVID-19 mozü bener aruba nunga tetsükdaktsü ajuru.

Ken o jembishinü tenzükshitsü mechi Biden administration ajanga Iran nem tenokdangba agüja aliba kar agientsü aser iba melen uranium enrichment shilem 20 soita atatsü sentong kar benokdang, ta hopta tetenzüklen osang kar liasü.

Saka Iran ketdangsür kati sorkar meyong Press TV dang, tenokdangba kar agientsü mechi Tehran-i uranium enrichment maparen majemdaktsütsü, ta ashiba sülen iba osang remsep.

US-i tenokdangba ajunga agiena aser Iran-i itemji jangjaba sülen ang nuclear tezüngzüktep nung aliba ama Iran-i anidaktsü, aser tenokdangba agiendaktsütsü atema arrsanga mali, ta Iran Supreme Leader Ali Hosseini Khamenei-i sentong aika nung shiogo.

"Tenokdangba agientsü atema mapang agitsü ta America nungeri tiazü jembir. Parnoki ibaji ghonda ka nung inyaktettsü aser asenoki mapang tatsüka dang nüngdaker. Perepshitsü screw ishika dang lir," ta Rouhani-i Bodhbarnü ashi.



Vietnam indang National Assembly nung mendenpuba tasen inyaktsü shimtetba sülen Vuong Dinh Hue ya March 31, 2021 nü agiogo. 14 buba National Assembly indang session 11 buba nung Vuong Dinh Hue ya mendenpuba tasenba ama Bodhbarnü shimteta liasü.

Aung San Suu Kyi junga lir amai angur: Okatsür

Naypyitaw, Metsüremi/March 31 (Agencies): Myanmar lenir menden nungi atsüngdoker alila Aung San Suu Kyi Bodhbarnü video meeting ka nung temang junga lir amai nguogo, ta la atema okatsür kati ashi, aser February 1 nü mitkartemi sorkar atsüngdokba sülen hopta aika azüdokshia aruba mapang United States-i kanga tongtipang masüba embassy staff tem dang iba linük yutsür ainshitsü totuyuba agütsüogo.

Nobel Peace Prize ngur alila Suu Kyi ya mitkartemi sorkar atsüngdokba anogo nungi pua yua lir, aser lai okatsürtem den ajurutepnüa liasü aser police dener sensaksemtsü memolung, ta okatsür Min Min Soe-i osangbener dang telephone ajanga ashi.

"Amay anema lir amai angu, la tereprangtsü sentsü junga lir," ta Min Min Soe-i Suu Kyi dang 'oja' ta nüngja amshia ashi.

Iba video conference mapang mitkartemi sorkar atsüngdokba sülen la anema ken o benoka alibatem dang jembia liasü, ta okatsüri ashi.

Arishi küm 75 tain, Suu Kyi ya mitkartemi sorkar atsüngdokba anogo apu aser la anema ken o aika benoka lir, aser item rongnung ozüng alema walkie-talkie radio trok bendanglen nungi bener aruba aser coronavirus protocol tem nung aibelenba densema lir.

Tesüsa osangbener senden ana nung mitkartemi jembiba mapang lai süpokrem maparen inyak, ta tai tongloksü.

La indang ken o ya maneni Bresthostibarnü jembitsü.

Suu Kyi'er teloki takok anguba November election nung ashikülak mapa inyaka lir, ta aija mitkartemi sorkar atsüngdok. Saka election commission-ibo election tim yimya nung agi, ta ashir.

Küm ter shi democracy tsütsüi meyiptsü asoshi

inyaktepa arur tanaben mitkartemi yimsü asüba anema nüburttem kanga sashia nokdaker.

Longkak aitba mapang civilian 521 shi takum samaogo, aser item rongnung nisung 141 bo Honibarnü asüba lir, koba rongrongshirong adoker anogo tamajungtiba lir, ta Assistance Association for Political Prisoners (AAPP) ajanga ashir.

Artsülen army aser ethnic minority telungpur tsüngta raraba tali kumogo. Iba rongrong nungi jena aotsü merangba refugee tem kidanger linüktem nung jenoktsü meranger.

Bodhbarnü linük tesem balala nung longkak aiter meyirijang aika temai adoka liasü.

Linük northwest tsütsü Kale jila nung security forces aser civilian tem tsüngta prangbong agi khatapa liasü, ta Mizzima news portal ajanga

ashi.

Iba makmak-shima nungi linük anitettsü asoshi lenmang monguteter aser iba atema linük balalai khuret abenba tali akumer. Southeast Asia linüktemi tangatetep kati arutsü asoshi inyaktepba nung yaritsü shiaka mitkartemi itemji agizüka mali.

Yimti nung mitkartemi yimsü asüba anema nokdakertemi telungpur den lungjemer nokdaktsü ayongzükogo, shirnoki arrtsülen autonomy tuluba aginüa küm aika rarayonga arur.

Mitkartemi sorkar tashi rakzükba ya mapang talangka nungi tebo kuma jembia arur aser linük lungjemdaktsütsü tashi par dak dang lir, ta ashir.

Myanmar nung telungpur telok tejentiba, Karen National Union (KNU) ajanga Mongulbarnü sangdong ka nung, anüdoklen Thailand den arrtsülen par kübok aliba tesentem nung sorkar anema

nokdaktsü renemshir, ta shia liasü.

KNU-i linük balala, talisa Thailand dang Karen nüburttem azüdokshi nungi jena aortem yaritsü ayongzük aser civilian anema azüdokshiba anentsü asoshi linük balala dang mitkar den tesendaktep rakdangtsü ajungshi.

Hopta tatemlen mitkartemi tayimtsü amshia KNU alidak bomb poklokja yimdaklir nisung 3,000 shi Thailand-i jena ao.

Linük north tsütsüa mitkartem aser Kachin Independence Army (KIA) tsüngta raraba tali kumogo, aser Bodhbarnü KIA ajanga police station ka maka liasü.

Myanmar northwest tsütsüa nüburttem arrtsü alema India nung jenoktsü meranger.

Mitkartemi tashi amshia sorkar atsüngdokba ya anüolen linüktemi aitsüogo aser Suu Kyi chioktsü akhanger. Linük karibo mitkar lenirtem nem tenokdangba balala agüja lir.

Assam rifles-i sentong balala ayongzüka agi

Dimapur, Metsüremi/March 31 (TYO): HQ IGAR (North) kübok Assam Rifles, Kohima Battalion-i, March 30 nü Khedi Baptist Higher Secondary School, Kohima nung kaketshirtem atema Drawing & Painting tetoktepba ka ayongzüka katsüogo.

Iba tetoktepba nung kaketshir 45-i jangrabangra shilem agiogo. Kohima Battalion-i sentong tajung ayongzüka katsüba atema school-i kanga pelaba lemsatepba den tarutsü linük nükdangtem lenla ajak nung terenlok atema tarutsü nunga iba amala sentong ayongzüka katsütsü yongyaa ataba

lemsatepba liasü.

Kasa mapang nung Assam Rifles Kiphire Battalion-i, March 30 nü Kiphire District kübok Pungro nung Mushroom Cultivation Centre ka amenoktsüogo.

Organic konger metsüba ajungketa Pungro yimtsüung nung alirtem tangar dak metaloker malitsü atema lenmang tanga ka lapoktsütsü asoshi Mushroom Development Centre ya NEC, EAC Pungro, Nuhuta Tumki-i, Pungro GB Union aser Yimchunger Tribal Council züngsemtem matsüngdang lapokja liasü.

Maneni HQ IGAR (North)

tawabangba kübok Assam Rifles Jairampur Battalion-i, March 29 nü Arunachal Pradesh, Changlang District kübok Kovin yimtsüung nung saisapong balala nung amshiba osettem lemja liasü.

Asaya nung amshiba oset balala agütsüba ajanga Kovin yimtsüung nung sports infrastructure ajungkettsü aser lanurtem ajungmesotsü. Assam Rifles omen; 'Friends of the Hill People' den puteba parnoki saisapong balala nung amshiba osettem lemsüogo. Kasa mapang nung yimdaklirtemi tenla tajung asoshi AR dang kanga pelaba lemsatepogo.

Mi Notebook Pro 14 & Mi Notebook Pro 15 sayaogo



Metsürmei/March 31, 2021 (Agencies): Xiaomi company-i hopta tenzüklü nungi "Mega Launch" setong kübok oset aika sayaa arudar. Parnoki Mi 11 Pro, Mi 11 Ultra, Mi 11 Lite 5G, Mi Mix Fold sayaogo aser China nung Mi Notebook Pro 15 aser Mi Notebook 14 laptop model tem sangdongogo.

Xiaomi indang laptop tasentem ya Intel indang 11th Generation Tiger Lake CPUs aser Nvidia GeForce graphics ajanga tashi agütsütsü. Mi Notebook Pro 15 nung OLED display aser Mi Notebook Pro 14 nung LCD display keta lir. Mi Notebook laptop tasentem

Ajisiüka Mi laptop tem tanga linüktem nung sayatsüba iba indang osang kecha mali.

Display tasazük aser feature balala asüba dak alaka laptop anaprongla specifications mesükteper. Mi Notebook 15 Pro nung 15.6-inch OLED display den 3,456x2,160 pixels resolution, 400 nits peak brightness, aser 93 percent screen-to-body ratio keta lir. Iba laptop nung 60Hz refresh rate, 100 percent sRGB aser 100 percent DCI-P3 colour gamut keta lir.

Kasa mpang nung Mi Notebook Pro 14 nung 14-inch 2K display den 120Hz refresh rate, 88 percent screen-to-body ratio, 16:10 aspect ratio, 216 ppi pixel density, aser 300 nits, peak brightness keta lir. Pro 14 nung 100 percent sRGB colour gamut aser TUV Rheinland low blue light certificate dena arutsü.

Mi Notebook Pro 15 aser Mi Notebook Pro 15 naprongla 11th generation Intel Core i7-11370H CPU ajanga tashi agütsütsü. Laptop anaprongla nung 16GB DDR4 RAM aser 512GB SSD storage keta lir. Connectivity option tem rongnung Wi-Fi 6, Bluetooth 5.1, USB type-C ports ana, Thunderbolt 4 port, aser 3.5mm headphone jack densema lir.

ya configurations balala nung saka sentsü ka nung dang sayaogo. Laptop anaprongla nung Thunderbolt 4 ports inokja lir. Mi Notebook Pro 15 ya CNY 6,499 (sen 72,700) aser Mi Notebook Pro 14 ya CNY 5,999 (67,100) agi tenzüka angutsü.

Notebook Pro 15 aser Mi Notebook Pro 14 naprongla silver sentsü nung angutsü. Mi Notebook Pro 15 ya China nungbo mekazüka ayu tenzüko aser April 2 nü nungi belenshi tenzüksü. Kasa mapang nung Mi Notebook 14, April 26 nü nungi mekazüka ayu tenzüksü aser May 1 nü nungi tenzüka ayoktsü.

Samsung Galaxy S20 FE 5G India nung sayaogo

Metsüremi/March 31, 2021 (Agencies): Samsung Galaxy S20 FE 5G, alima ajunga nung sayaba sülen ita trok shi lir India nunga sayaogo. Tang tashi nung Samsung Exynos 990 SoC aketba Samsung Galaxy S20 FE (mesera Fan Edition) 4G variant dang India nung sen 44,999 agi nguya liasü. Kasa mapang nung 5G variant nung Qualcomm indang octa-core Snapdragon 865 processor keta lir aser 8GB RAM aser 128GB internal storage model dang angutsü. 5G connectivity keta aliba dak alia phone nung design language kasa dang aser 4G den feature kasashi dang keta lir.

Specifications dak sendakba nung Samsung Galaxy S20 FE 5G nung 6.5-inch Full-HD+ sAMOLED Infinity-O display den 120Hz refresh rate aser selfie snapper atema punch-hole cutout ka keta lir. Phone nung octa-core Qualcomm Snapdragon 865 SoC den 8GB RAM aser 128GB storage inokja lir, koba microSD card ka amshia maneni atsülangtettsü.

Samsung Galaxy S20 FE 5G nung triple rear camera system ya rectangular module ka telung

nung inokja lir aser LED flash dena keta aliba angutsü. Rear camera setup nung 12-megapixel wide-angle camera ka, 12-megapixel ultra-wide-angle camera ka aser 8-megapixel telephoto shooter ka densema lir aser iba ajanga 3x optical zoom aser 30x Super-Resolution Zoom tashi support asütsü. Tejaklen selfies aser video chats atema 32-megapixel shooter ka inokja lir.

Samsung Galaxy S20 FE 5G nung tanga tongtibang feature tem rongnung 5G, 4G LTE, dual-band Wi-Fi, Bluetooth v5.0, GPS, aser charging aser data sync atema USB Type-C port densema lir. Iba smartphone nung 4,500mAh battery den 15W charging support inokja lir.

Samsung Galaxy S20 FE 5G, 8GB RAM + 128GB storage model ya India nung sen 55,999 angutsü. Iba phone ya introductory price sen 47,999 agi angutsü saka tang tashi nung Amazon aser Samung India site nung inokja mali. India nung 4G variant ya sen 44,999 agi tenzüka angutsü. Iba phone indang 256GB variant ka dena sayaogo aser India nung iba variant ya sen 53,999 agi ngudar.



Temesepba mozü beshiba ken o nung aija apuba sülen Narcotics Control Bureau (NCB) ketdangsertemi Bollywood actor aser taoba Bigg Boss contestant Ajaz Khan medical test atema pur aoba noksa nung angur.

Dance Deewane 3 nung züngsem 18 dak Covid-19 putet

Mumbai, Metsüremi/March 31, 2021 (Agencies): India nung coronavirus wara tanaben adoker külen nungi iba tashidak kanga sashia prokba tesem rongnung Maharashtra state alitsü aser tang agia aliba dance reality show Dance Deewane 3 nunga crew züngsem 18 dak iba tashidak putetogo.

Iba osang ajanga, Mumbai indang Filmistan Studio (Goregaon) kübok show indang set nung mepetmesü aika adokdaksüogo. ETimes TV sangdong ajanga angazükba agi, Covid-19 tashidak puteter alir crew züngsem melentsü atema iba dance reality show indang producer Arvind Rao-i maparen tenzüko.

FWICE (Federation of Western India Cine Employees) General Secretary Ashok Dubey-i iba osang jangjatsü aser pai ashiba agi, kechi atalokogo, kanga dang tejashitsü osang lir aser parnok yakta taneptsü angutsü asoshi sarasademtsür, ta kasa sangdong nung shia lir.

Iba reality show taruba shilem ya April 5 nü tangoktsü aser iba show metangokdang crew ajak jelia Covid-19 test agitsü. Covid test negative alirtem ang iba show nung melatsü aser kasa inyakyim nung anidaktsü.

Dharmesh Yelande nungertetendanger ama shilem agidar. Kasa sentong nung Raghav Juyal-i show ketdangsüa (host) agir.

Tawa tanü, Ranbir Kapoor, Aamir Khan, R Madhavan, Kartik Aaryan aser Paresh Rawal nungertensema Bollywood nung nisung aika dak coronavirus tashidak putetba osangtem ajanga angazükogo. Kasa mapang television industry tsütsü, Bigg Boss 14 nung shilem agir Nikki Tamboli, Ghum Hai Kisikey Pyaar Mein actors Neil Bhatt aser Aishwarya Sharma, Prem Bandhan Mani Joura aser Arianah Agarwal aser Mehndi Hai Rachne Waali actor aser crew züngsemtem dak tanaben adokba coronavirus wara agi kongshiogo.

Maharashtra indang State Health Department ajanga State nung coronavirus putetba den külemi iba wara agi nisung taküm samaba ajema akümba asadangtetogo. Hombarnü (29.03.2021) tashi Covid-19 tashidak tasen puteter nisung 31,643 aser nisung 102 shi taküm sama. Ano külen, Deobarnü (28.03.2021) State nung nisung 40,414 dak coronavirus tashidak puteta liasü. Tanü tashi Maharashtra nung Covid-19 tashidak puteter nisung 27,45,518 tashi tuogo aser nisung 54,283 süogo.



"Breaking barriers" omen nung ajemdaker Dimapur Phom Students' Union-i ayongzüka Mezüngbuba Phom Momyü volleyball trophy tanü DDSC stadium nung tenzüko. Asayamung lapokba sentong nung Minister Health & Family Welfare, Nagaland, L. Imtizulu Phom alakteta jaoker liasü. Iba asayamung nung team 15-i shilem agidar.

St. Xavier College asayamung shibangba sentong agiogo



March 31 nü St. Xavier College, Jalukie Annual Sports & Games Day shibangba sentong nung Minister for Higher Education & Tribal Affairs, Temjen Imna Along-io jembiba noksa nung angur.

Dimapur, Metsüremi/March 31 (TYO): St. Xavier College, Jalukie Annual Sports & Games Day shibangba sentong March 31 nü Xaverite Stadium nung agiogo. Iba sentong nung Minister for Higher Education & Tribal Affairs, Temjen Imna Along alakteta jaoker liasü.

Iba sentong nung DC Peren, Sentiwapang Aier, Advisor, SCERT, IPR & Village Guards, Toshi Wungtung aser Kohima Bishop, Rev. Dr. James Thoppil nungeri tetushi tesemdang ama shilem agi.

Sentong nung o jembiba mapang Temjen Imna Along-i, state kübok lanurtem atema

Catholic Institutions tem nung 100 percent education policy benoka lir, ta ashi. Paisa, Catholic Institutions tem nungi adokba kaketshirtem lenla aika nung lenirtem lir aser parnok mapa tushitsü langa lir, ta ashi.

Along-i, March 22 nü Lamhainamdi yimtsung nung lendong atalokba sasa bilemba lemsatepba den kechi lokti nung südir süaka nisung tepsetba agizüksü makok, ta shia sentepa aliba lokti dang iba amala inyakyim aitsütsü ajungshi. Paisa, yimjung nung alitsü atema sentepa aliba lokti ayongzüka liasü. Nisung ajak mit adoker saka yimjung yimya

sayuba ajanga nisung ka tashimait mesayur saka nisung ka tashi sayur, ta Imna Along-i shisem.

Maneni Minister-i nüburtem dang tashi ita aser tasü ita alitsü ayongzüka den kaketshirtem dang meranga inyaksü ajungshi. Pai, meranga inyakba ajanga nüburtem tamendakdak yanglushitsü atema St. Xavier College nungi temlungtetba tulu aliba aser meranga inyakba kaketshirtem adoktsü imlaba lemsatep. Imna Along-isa, kaketshirtem dang senso tajung kaka akümtsü aser khuret angatetba senso tajung kaka küma yimji yimjung nung alitsü merangtsü ajungshi.

Advisor, SCERT, IPR & VG, Toshi Wungtung-i kaketshirtem ajungshiba mapang, education ajanga tetsür aser tebur ka temsüa akümba sayur, kong tekolok aser shitemang renloka aotsüba densema lir, ta ashi. Advisor-isa, kaketshirtem dang temesepba mozü achiba aser yi ajemba nungi pilaa alitsü ajungshiba den yimjung abener aser lokti longjemdaksür kaka akümtsü ajungshi.

Sentong nungsa kaketshirtemi sobaliba tsüngsang, Parade Contingents march past aser ken ajanga lokti ayongzüka.

Tebur league nung Rebecca mezüngbuba tetsür referee kümogo



Metsüremi/March 31, 2021 (Agencies): English men's professional league nung Rebecca Welch mezüngbuba tetsür referee asütsü shimogo. Lai taruba Hombarnü fourth tier fixture nung Harrogate aser Port Vale na asaya achaayangtsü.

"Tetsür rongnungi mezüngbuba referee asütsü shimba indangni mezüngbo mejangjai laisü," ta Welch-i Mongolbarnü ashi.

"Kü nem appointment nem agütsüba sülen ni kanga pela liasü, ajisüaka bilemdangyonga ao nung tetsürtem rongnungi mezüngbuba referee asütsü shimba ya kanga jangrademtsüka. Ni aser ozü kibong kanga nema adanger," ta lai ashi.

English Football League yagi Premier League kübok divisions asem achaayanger

kong League Two densema lir aser Hombarnü Welch-i iba league nung asaya ka achaayangtsü.

"Ni kanga pelar. Iba atema ni meranga inyakogo aser EFL nung inyaksü atema maangka anguba ya jangrademtsüka lir," ta Welch-i ashi.

"Tetsürtem shirnok parnok indang category nung top 1% nung lir parnok tejakleni otettsü, ta sayutsü kanga tongtibang ta bilemer. Iba ajanga tangar nükrangdong kümdaksür aser parnokia kasaji ajangzüktettsü ta jangjar.

"Iba ajanga tetsür chanutem atema maangka lir ta sayur, shirnok referee akümtsü jangrar mesera referee kümer lir. Parnoki EFL referee akümtsü atema inyaksü mesera Premier League nung (referee assistant) Sian Massey-Ellis ama akümtsü merangtsü," ta lai ashi.

African Cup Qualifier: Benin aser Sierra Leone na asaya athi

Cape Town, Metsüremi/March 31 (Agencies): Mongolbarnü African Cup of Nations qualifier nung Benin aser Sierra Leone na asaya tenzüksü lia Benin nungi asayar pongu dak COVID-19 tashidak potettsü ta ashishia parnoki masayatsü asoshi telemtetba agi.

Sierra Leone qualify asütsü asoshi takok angutsü nüngdaka liasü aser kasa mapang nung Benin-bo draw asü nunga qualify asütsü liasü.

Team ana rongnung kabo taruba küm Cameroon nung asayatsü atema team 24buba kümer lila.

Freetown nung asaya tenzütsü mapa tatsüka dang lia asayar dak tashidak potetba sangdong. Asaya tenzüksü asoshi atakzüka aliba mapang ghonda ana süia aoba aser Benin team asayatsü asoshi maruba sülen Sierra Leone Football Association-i asaya athiba sangdong aser Confederation of African Football-i jenjang tapet agitsü ta ashi.

Osang ajanga ashiba agi, iba mapang nung Benin team bo kidangi meyipa aotsü atema airport-i oya liasü.

African Cup qualifying nung asaya tenzüksü lia local ketdangsurtemi bendanger team nungi asayar dak COVID-19

tashidak potettsüba atema ashishiba ya tang mezüngbuba masü.

Hombarnü Togo nung qualifier asayatsü lia Kenya nungi tongtibang asayar pezü dak tashidak potettsüba atema parnoki ashishio. Kenya federation tir Nick Mwendwa-i, asaya nung shilem magitetba asayartem ajak anogo ishika tejakdang Kenya nung tashidak tendangba mapang tashidak keta aliba mepotet, ta ashi.

Qualifiers tatembangbuba anogo Benin-Sierra Leone asaya athiba den Ivory Coast aser Ethiopia na asayaa minute 10 anunga lia tembang, kechiyong Ghana nunger referee Charles Bulu süjia ao aser asayaba moapu nungi stretcher nung bener tugu. Iba asaya atema fourth official Ivory Coast nungi liasü anungji pai asaya machayangtet.

Iba asaya Ivory Coast-i goal 3-1 agi koka liasü. Asaya ajungbena metembang tsüngda Willy Boly, Franck Kessi aser Jean Evrard Kouassi nungeri goal kaka idaktsür liasü. Ajisüaka Ethiopia soccer federation-i result magi akümtsü ta shiaka team anaprongla qualify süadokogo.

Tamakok nguaka Ethiopia qualify süogo, kechiyong Madagascar aser Niger na asaya kasasa nung tembang.

Ivory Coast-bo finals tongatoker liasü.

Qualifier tatembangbuba asaya nung Mauritania, Guinea-Bissau aser Cape Verde nungera qualify süogo.

African Cup ya taküm January aser February na tsüngda asayatsü liasü, ajisüaka coronavirus wara pokteter aliba ajanga taruba kümi belenerogo.

10buba Phom Monyu Open Volleyball asayamung tenzükgogo



Eastern Nagaland Woman Organization tir A. Shamthai Phom-i asayartem den ajurutepba noksa nung angur.

Dimapur, Metsüremi/March 31 (TYO): 10buba Phom Monyu Open Volleyball asayamung March 30 nü Public Ground, Longleng nung tenzükgogo. Iba asayamung ya Longleng Town Students Union (LTSU)-i ayongzüka "Gits, Guts, Glory" omen nung ajemdaker asayadaki.

Asayamung lapokba sentong nung Eastern Nagaland Woman Organization tir alakteta jaoker liasü. Sentong nung o jembiba mapang A. Shamthai Phom-i, kümshia iba asayamung liasü.

ayongzüka asayaba aser lanur asayartem nem sabang tajung agütsüba atema LTSU nem tenüngsang agütsü. Laisa, saisapong ajanga tajangzükg agütsüba, yimyayimpong shidak benshitsü koda tongtibang, libaliro tajung benshitsü aser teti exercise agitsüba dak rangloker jembi aser asayartem dang asayar yimya shidak benshitsü ayongzükg.

Kasa mapang nung lokti pelaa agizüka o Planning Committee (PMOVT) mendenubai jembi aser BU-OO-LI-i Special Presentation ka agütsü aser taoba LTSU tir Henai Phom-i POVT koda tongtibang iba indang jembia liasü.

BILEMDANGANG
"Telok metsüdaktsüsa masü ajangzüksüsa jembiang."